



hubentud den movecion

Redacta pa Mercedes Abdul

Enid de Kort:

ARUBA MESTER DESAROYA HOPI AINDA, RIBA MANEHO DI HUBENTUD

CHANGE"

Seccion Hubentud den Movecion a conversa cu Enid de Kort, Trahador Social pa Hubentud, kende a forma parti di e delegacion Arubano cu dia 9 di Januari ultimo a participa den e conferencia "Challenge of Change III" na Hulanda.

"Pa mi tabata hopi importante pa participa den e conferencia aki pa motivo cu mi tin seis aña haciendo trabao cu hubentud na Aruba.

Loke pa mi tabata hopi importante ta di wak con otro paisnan ta trahando riba proyectonan pa hubentud, y si tin desaroyonan nobo den e plannan aki".

Enid ta menciona cu tambe tabata importante pe pa haya un bista riba ki maneho pa hubentud, e paisnan participante a desaroya.

Esaki pa motibo cu na Aruba no tin un maneho riba e tereno aki.

"Maneho kiermeen un filosofia riba den ki direccion nos kier bay pa cu nos comunidad en general, y hubentud en particular.

Na Aruba no tin nada concreto pasobra e trabaonan pa hubentud te ainda no ta suficientemente desaroya.

Mi ta haya cu na Aruba, politicamente tambe, hubentud no ta worde mira como un prioridad, siendo cu hubentud ta un partner den construccion di nos futuro".

Enid de Kort ta señala cu por ehemplo, e Seccion pa Hubentud di Sociale Zaken ta dispone di solamente dos trahador social pa hubentud.

"Nos ta topa cu un escala grandi di trabaonan pa haci y retonan pa asumi riba tereno di hubentud, cu si no bin un maneho integral nos no por yega na e meta cu nos kier logra".

"CHALLENGE OF

Durante e conferencia aki Enid de Kort a participa den diferente charla y tayernan di trabao.

"E persona cu mas a impresionami ta Pastor Gerry Pantin, pasobra el a enfoca riba norma y balornan di antes y awor, y tambe claramente el a haci distincion entre hoben di antes y di awor, y mayornan di antes y di awor.

Mi a reconece tur loke Pastor Pantin a bisa den mi experiencia como trahador social na Aruba. Pa duna algun ehemplo, mi por menciona: nos ta spera cu nos hobennan ta sigui e bon ehemplo, pero nos mes no ta dunando nan e bon ehemplo; nos ta verwacht muchanan responsable pero hopi adulto mes ta actua irresponsable; tambe el a bisa cu awendia a bira algo normal cu tin hopi famia cu no ta funciona y esey mes ta pone cu hobennan no ta haya suficiente guia; el a acentua tambe cu adultonan ta duna hopi critica na hubentud y esey mes ta desaroya poco autoestima y seguridad cerca nos hobennan; di otro banda adultonan no ta compronde kico nos hubentud ta pasando awendia; e ta bisa cu hobennan ta haya hopi influencia y nan no a siña con pa haci choice; hobennan no ta haya ehemplo kico ta felicidad".

Palabranan di Pastor Pantin cu Enid ta acentua "nunca lo nos no tin exito si nos no scucha loke hobennan tin di bisa nos" y "mesun sentimentonan cu adultonan tin, hobennan tambe tin".

COMPARANDO ARUBA CU OTRO PAISNAN

Comparando Aruba cu otro paisnan (rico y pover) Enid ta ripara cu Aruba, riba maneho di hubentud, mester desaroya hopi ainda.

Pa duna un ehemplo den kico Aruba mester desaroya, e ta menciona:

"Pa di prome gobernante y trahadornan di maneho mester cuminsa tuma e trabao social y di hubentud na serio.

Mi ta haya cu nos ta focus demasiado riba e factor economico, lagando e desaroyo humano un poco atras. Ta conoci cu si nos no inverti den e ser humano e costo lo sali gobierno mas caro pasobra e sociedad ta keda bay atras.

Maneho pa hubentud mi ta mirele den un parti integral: educacion, famia, recreacion, cas, servicionan social y migracion.

Nos mester inverti den desaroyo general di hubentud y no solamente e hubentud cu ta den riesgo.

Mester cuminsa duna prioridad na trabao preventivo".

Esaki kiermeen introduci proyectonan cu ta yuda preveni problemanan y duna tools con pa anda cu diferente situacion den e tempo moderno.

"Bo no por traha cu hubentud sin traha cu mayornan. Esaki mester bay conhuntamente. Por ehemplo, mester desaroya programanan cu ta yuda mayornan comunica y compronde e desaroyo di e hoben, y banda di e mayornan desaroya programanan pa hoben cu ta prepara nan pa enfrenta bida, por ehemplo door trata topiconan manera: ken a mi ta como persona?. Kico ta nifica cu bo ta un ser humano?. Siña nan anda cu nan emocionnan, pa mucha homber y mucha muher; siña nan expresa nan

mes den tur contexto di bida".

TRABAO INTEGRAL

Enid de Kort a ripara durante e conferencia "Challenge of Change" cu e sistema di traha so no ta funciona mas. "Por ehemplo riba tereno di criminalidad, na Rotterdam polis, trahador social, mayor, maestro, y hobennan tambe ta participando den un proyecto.

Personalmente awor mi no kier traha pa adulto y hobennan pero conhuntamente cu nan. Es decir, teniendo cuenta cu nan deseo y spectativanan nos ta desaroya un proyecto".

CONCLUSION

Enid de Kort ta menciona e siguiente puntonan importante pa por hiba un bon maneho riba tereno di hubentud aki na Aruba.

1) Nos tur tin e responsabilidad pa tuma iniciativa

2) Pa yuda hobennan nos mester cuminsa pa yuda nos mes. Ken nos ta, unda nos kier bay?

3) Pa motibo cu mundo ta evoluciona constantemente nos mester ta conciente cu nos



Enid de Kort

no por bolbe mas na pasado, y cu e educacion cu nos a haya antes nos no por worde introducie bek. Pero nos mester cuminsa defini y ehecuta, norma, balor y principionan nobo cu ta adapta na e mundo di cambionan aki.

4) Nos mester cuminsa apoya y involucra hobennan den decisionnan riba maneho y tambe laga nan participa activamente den bestuur y comisionnan pa asina nan sinti nan mes util den e comunidad, y tambe pa nan siña carga responsabilidad pa cu nan futuro.

"Mi ta haya cu gobierno y sector priva mester bay contribui financieramente pa proyectonan importante pa hubentud worde ehecuta. Tin hopi idea, palabracion y recursonan humano pa desaroya proyectonan importante, pero si financieramente no ta worde inverti nos lo sigui keda na palabrato so. Mester tene cuenta cu e trabao curativo semper ta resulta mas costoso cu e trabao preventivo".



Just landed Cars Jeans and Jump Suits

PRO FASHION

The Mainstreet Fashion House